

那先比丘經

失譯人名附東晉錄

那先比丘經 卷上

失譯人名附東晉錄

佛在舍衛國祇樹給孤獨園。時諸比丘僧比丘尼優婆塞優婆夷諸天王大臣長者人民。及事九十六種道者。凡萬餘人。日於佛前聽經。佛自念人眾日多身不得安。佛意欲捨人眾去。到閉屏處坐。思惟念道。佛即捨人眾去。入山至校羅叢樹間。其樹有神佛坐。其下思念清淨之道。去叢樹不遠。有群象五百餘頭。中有象王賢善知善惡之事。譬如人狀象輩。眾多周匝象王邊。中有雄雌長齒中齒少齒者。象王渴欲行飲水時。諸小象走居前入水飲。飲已於水中走戲撓撈水令濁惡。象王不能得清水飲。象王飢欲行食草。諸小象復走居前食噉美草。走戲蹈踐其上。象王不能得淨草食。象王自念我群眾多患。是諸象及小象子撓水令濁。令草不淨。而返常飲濁水。食足踐之草。象王自念我欲棄是諸象去。至一屏處快耶。象王即棄群而去。轉行入山。到校羅叢樹間。象王見佛坐樹下。心大歡喜。則前至佛所。低頭屈膝。為佛作禮。却在。一面住。佛自念我棄眾人來在是間。象王亦復棄眾象來。到是樹間。其義適同。佛為象王說經言。佛於人中最尊。象王於諸象中亦尊。佛言我心與象王心適相中合。我與象王俱樂是樹間。象王聽經。竟心即開解曉。知佛意。便視佛所。彷彿行處。以鼻取水灑地。以鼻撈草掃地。以足蹈地。令平好。象王日朝暮承事。如是久後。佛便取無為泥。

洄道去。象王不知佛處。為周旋行求索。佛不得。啼泣愁憂。不樂不敢食飲。時國中有佛寺。舍在山上。名迦羅洄。中有五百沙門。共止其中。皆已得阿羅漢道。常以月六齋日誦經。至明時。象王亦在山上。近於寺邊。象王知有六齋日誦經。至其日。象王常行入寺聽經。諸沙門知象王喜聽經。欲誦經時。須象王來到。乃誦經。象王聽經。徹明不睡。不臥不動不搖。象王數聞經。承事佛。故久後。象王亦以壽終。死便得為人。作子生婆羅門家。不復聞佛經。亦不見沙門。便棄家入深山。學婆羅門道。在山上。止。近比亦有一婆羅門道人。俱在山上。相與往來。共為知識。其一人自念我厭世間。縣官憂苦。老病死後。當入地獄。餓鬼畜生。貧窮中。用是故我除頭鬚。被袈裟。作沙門求度世。無為道。其一人自念我願欲求作國王。得自在。令天下人民皆共屬我。隨我教令。兩人共願如是。久後二人各復壽終。得於世間作人。其一人前世宿命欲求作國王者。生於海邊。為國王太子。父母便字子為彌蘭。其一人前世宿命欲求度世。無為泥洄道者。生於天竺罽賓縣。父母便字為陀獵。生便被袈裟。俱生。所以與袈裟俱生者。本宿命所願。其家有一象王。亦同日生。天竺名象為那。父母便因象字。其子名為那先。那先長大。年十五。六有舅父。字樓漢。樓漢作沙門。有絕妙之才。世間無比。眼能徹視。耳能徹聽。自知所從來。生行即能飛出。能無間入無孔。自在變化。無所不作。天上天下。人民及蜎飛蠕動之類。心所念。樓漢皆預知之。那先便自往到舅父。計自說言。我意佛道。欲除頭鬚。被袈裟。作

沙門。今我當為舅父作弟子。寧可持我作沙門耶。樓漢知那先宿命。作善有慧。甚重哀之。因聽令作沙彌。那先始作小沙彌。受十戒。日誦經。學問。思惟。經戒。即得四禪。悉知諸經。獨未受大沙門戒。於時國山中有佛寺。舍名曰想禪。想禪寺中有五百沙門。皆得阿羅漢道。中有第一阿羅漢名頰陂。曰能知天上天下。去來見在之事。那先年滿二十。因作大沙門。受大沙門戒。便到想禪寺中。至頰陂。曰所時五百阿羅漢。適以十五日說大沙門戒。經在講堂上坐。大沙門皆入。那先亦在其中。眾沙門悉坐。頰陂曰。悉視坐中。諸沙門心。皆是阿羅漢。獨那先未得羅漢道。頰陂曰。便說譬喻。經言。若入折米。米正白。中有黑米。即剔不好。今我坐中。皆清白。獨那先為黑。未得阿羅漢道。那先聞頰陂。曰說經。如是大愁。便起為五百沙門。作禮。已即出去。那先自念。我不宜在是座中坐。我亦未得度脫。其餘沙門。皆已度脫。譬若眾師子。中有狐狗。今我亦如是。我從今不得道者。不復入眾中坐也。頰陂曰。知那先意。便呼那先。著前。以手摩那先頭。汝今得阿羅漢。不久勿愁憂也。頰陂曰。便欲坐。止那先。那先復有一師年八十餘。字迦惟。曰。其縣中有一優婆塞。大賢善。常日飯。迦惟曰。弟子。那先至。為師持應器。行取飯具。師令那先。口含水。行到優婆塞家。取飯具。優婆塞見那先。年少端正。行與人絕異。宿知有慧。預聞有明志之名。能說經道。優婆塞見那先。入其舍中。便即起立。前為作禮。却又手言。我飯諸沙門。日久。來嘗有為我說經者。今從我那先。求哀願。為我說經。解我愚癡。那先即

自念我受師教令我口含水不得語。我今吐水者爲犯師戒。如是當云何。那先念優婆塞亦高才有志。我爲其說經想即得道。那先便吐水而坐。即爲說經。人布施作善奉行經戒。今世安隱後世便生天上。下生人中。即當明慧富貴。後不復入地獄餓鬼畜生中。人不奉行經戒者。於今世苦。後世復墮三惡道中。無有出時。優婆塞聞經心即歡喜。那先知優婆塞心歡喜。便復說深經言。世間萬物皆當過去。無有常在者。萬物過去皆苦。世間人身亦如是。世間人皆言是我身。過我許。是皆不得自在。泥洹道者。最樂泥洹者。不生不老不病不死不愁不憂。諸惡勤苦皆悉消滅。那先說經已。優婆塞即得第一須陀洹道。那先亦自得須陀洹道。優婆塞大歡喜。便爲那先好美飯。那先語優婆塞。先取具著師鉢中。那先飯竟。澡漱訖。畢持飯具還與師。師見飯具言。若今日持飯具來。大好已。犯眾人約。當逐出汝。那先愁不樂。師言會眾比丘僧眾。比丘僧悉會坐。師言那先犯我曹眾人約來。當共逐出。不得止眾中也。頰陂曰說譬喻言。如人持一箭射兩準。如是曹人不應逐出也。那先自說得道亦令優婆塞得道。不應逐出。那先師迦維曰言。正使一箭中百準會爲眾人約。不得留止。餘人悉不能如那先得道。當已絕後不逐出。那先者。餘人復效無以却。後眾坐中皆默然。隨師教即逐出。那先那先便以頭面著師足。起遍爲眾比丘僧作禮。禮竟便去。入深山中坐樹下。晝夜精進。念道不懈。便自成得阿羅漢道。能飛行亦能眼徹視耳徹聽。亦能知他人心中所念。自知前世所從

來生。得阿羅漢。已便即來還入憇禪寺中。諸眾比丘僧中叩頭求哀。悔過。憇禪諸比丘僧。諸比丘僧即聽之。那先作禮竟便出去。那先轉行入諸郡縣街曲里巷。爲人說經戒。教人爲善。中有受五戒者。中有得須陀洹道。中有得斯陀含道者。中有得阿那含道者。中有作沙門得阿羅漢道者。第一四天王。第二忉利天帝釋。第七梵天王。皆來到那先前。作禮以頭面著足。却坐。那先皆爲諸人說經。名字徹聞。四天。那先所行處。諸天人民鬼神龍。見那先無不歡喜者。皆得其福。那先便轉到天竺舍竭國。止泄坻迦寺中。有前世故知識一人。在海邊作國王太子名彌蘭。彌蘭少小好喜讀經。學異道。悉知異道。經法難異道人。無有能勝者。彌蘭父王壽終。彌蘭即立爲國王。王問左右邊臣言。國中道人及人民誰能與我共難經道者。邊臣白王言。有有學佛道者。人呼爲沙門。其人智慧博達。能與大王共難經道。今在北方大秦國。國名舍竭古王之宮。其國中外交安隱。人民皆善。其城四方皆復道行。諸城門皆彫文刻鏤。宮中婦女各有處所。諸街市里羅列成行。官道廣大。列肆成行。象馬車步男女熾盛。乘門道人親戚工師細民。及諸小國皆多高明。人民被服五色焜煌。婦女傅白皆著珠環。國土高燥珍寶眾多。四方賈客賣買皆以金錢。五穀豐賤。家有儲畜。市邊羅賣諸美羹飯。飢即得食。渴飲蒲萄雜酒。樂不可言。其國王字彌蘭。以正法治國。彌蘭者高才有智。明世經道能難去來見在之事。明於官事戰鬪之術。智謀無不通達。時王出城遊戲。諸兵眾屯繞外。其王心自貢

高。我爲王能答九十六種經道。人所問不窮。人心適發。便豫知所言。王語諸傍臣曰。尙早入城。亦無所作。是問寧有明經道人。沙門能與我共難經說道者無。王傍臣名沾彌利望群。沾彌利望群白王言。然有沙門字野想羅。大明經道。能與王共難經說道。王便勅沾彌利望群行往請來。沾彌利望群即行請野想羅言。大王欲見大。師野想羅言。大善。王欲相見者。當自來耳。我不往也。沾彌利望群白王如是。王即乘車與五百騎共往到寺中。王與野想羅相見。前問訊。即便就坐。五百騎從悉皆亦坐。王即問野想羅言。卿用何故棄家捐妻子剃頭鬚。被袈裟作沙門乎。卿所求何等道。野想羅報王。我曹學佛道行忠政。於今世得其福。後世亦得其福用。是故我除頭鬚被袈裟作沙門。王問野想羅言。有人白衣有妻子。於家有妻子行忠政。於今世得其福。不後世亦得其福。不。野想羅言。白衣於家有妻子。有行忠政。於今世得福於後世亦得其福。王言。白衣於家有妻子。有行忠政。於今世後世同得其福。卿無故而棄妻子。除頭鬚被袈裟作沙門。爲野想羅便默然。無以報王。傍臣白言。是沙門大明健。有智迫。促未及說耳。王傍臣舉手言。王得勝。王得勝。野想羅便默然。受負。王即左右顧視。諸優婆塞。諸優婆塞面亦不慚。王念是諸優婆塞面亦難慚者。獨復有明經健沙門。能與我相難者耳。王語沾彌利望群復有明慧沙門。能與共難經說道者。無時那先者。諸沙門師。常與諸沙門俱出入。諸沙門皆使說經。那先時皆知諸經要難。能說十二部經。說經而種種別異。章斷句

逆我意。當有誅罰之罪。王言可去哀赦汝罪。今我作王爲不能堪飯沙門耶。慳慳慳愧不敢復語。沾彌利望群言。即往到那先所。便前作禮白言。大王請那先。那先言。王當令我與幾沙門俱行。沾彌利望群言。自在。那先欲與幾沙門俱行。那先便與野憇羅等八十沙門俱行。沾彌利望群言。悉俱行。且欲入城。沾彌利望群道中。並問那先。昨日對王言。無有何用爲那先。那先問沾彌利望群。卿意何所爲那先者。沾彌利望群言。我以喘息出入命氣爲那先。那先問沾彌利望群言。人氣一出。不復還入其人。寧復生不。沾彌利望群言。氣出不還定爲死也。那先言。如人吹筍氣。一出。不復還入。如人持鍛金笛吹火氣。一出。時寧得復還入不。沾彌利望群言。不復還入。如人以角吹地氣。一出。時寧復還入不。沾彌利望群言。不復還入。那先言。同氣出不復還入。人何以故猶不死。沾彌利望群言。喘息之間。我不能知。願爲我曹解說之。那先言。喘息之氣。皆身中事。如人心有所念者。舌爲之。言是爲舌事。意有所疑。心念之。是爲心事。各有所主。分別視之。皆空。無有那先也。沾彌利望群。心即開解。便受五戒。爲優婆塞。那先便前入宮。到王所。上殿。王即爲那先作禮。而却。那先即坐。八十沙門皆共坐。王極作美飯食。王手自著。那先前飯。眾沙門飯食。已竟。澡手畢訖。王即賜諸沙門人。一張褻袈裟。革屣各一量。賜那先野憇羅各三領袈裟。各一量。革屣。王語那先野憇羅言。留十人共止。遣餘人。令去。那先即遣餘沙門。令去。留十人共止。王勅後宮諸貴人。妓女。悉於殿上。帷中。聽我與那

先共難經道。時貴人妓女。悉出殿上。帷中。聽那先說經。時王持座坐於那先前。王言。當說何等。那先言。王欲聽要言者。當說要言。王言。卿曹道何等。最要者。用何等。故作沙門。那先言。我曹欲棄世間。勤苦不欲。更後世勤苦。用是。故我曹作沙門。我曹用是。爲最要善。王言。諸沙門。皆不欲。更今世。後世勤苦。故作沙門耶。那先言。不悉用。是。故作沙門。沙門有四輩。王言。何等。四。那先言。中有負債作沙門者。中有畏縣官作沙門者。中有貧窮作沙門者。中有真欲棄滅今世。後世勤苦。故作沙門。那先言。我本至心求道。故作沙門耳。王言。今卿用道。故作沙門耶。那先言。我少小作沙門。有佛經道及弟子。諸沙門。皆多高明。我從學。經戒入我心中。以是。故棄今世。後世勤苦。故作沙門。王言。善哉。王問言。寧有人死後不復生者。那先言。中有於後世生者。中有不復生者。王言。誰於後世生者。誰不復生者。那先言。人有恩愛貪欲者。後世便復生。人無恩愛貪欲者。後世不復生也。王言。人以一心念正法善。故後世不復生耶。那先言。人以一心念正法善。智慧及餘善事。故後世不復生。王言。人以一心念正法善。與智慧。是二事。其義寧同不。那先言。其義各異不同。王問。那先。牛馬六畜。頗有智無有智。那先言。牛馬六畜。各自有智。其心不同。那先言。王曾見穫麥者。不左手持麥。右手刈之。那先言。智慧之人。斷絕愛欲。譬如穫麥。王言。善哉。王復問。那先。何等爲餘善事者。那先言。誠信。孝順。精進。念善。一心。智慧。是爲善事。王言。何等爲誠信者。那先言。誠信者。無所復疑。信有佛。有佛經法。

信有比丘僧。信有阿羅漢。信有今世。信有後世。信有孝順父母。信有作善得善。信有作惡得惡。得信。是以後心。便清淨。即去離五惡。何等五惡。一者貪姪。二者瞋恚。三者睡眠。四者戲樂。五者所疑。人不去。是五惡。心意不定。去。是五惡。意便清淨。那先言。譬如遮迦越王。車馬人。從瀾渡水。令水濁。惡過渡。以去。王渴。欲得水飲。王有清水。珠置水中。水即爲清。王便得清水飲之。那先言。人心有惡。譬如濁水。佛諸弟子。得度。死生之道。心以清淨。如珠清水。人却諸惡。誠信清淨。譬如明月珠。王言。善哉。善哉。王問言。人精進。誠信者。云何。那先言。佛諸弟子。自相見。輩中。脫諸惡心。中有得須陀洹者。中有得斯陀含者。中有得阿那含者。中有得阿羅漢者。中有因相。效奉行。誠信者。皆亦得度世道。那先言。譬如山上大雨。其水下流。廣大。兩邊人。俱不知。水深淺。畏不敢渡。如有遠方人。來視水。隱知水廣狹深淺。自知力。勢能入水。便得渡過。兩邊人。眾便效。隨後亦得渡。去佛諸弟子。亦如是。見前人。淨心得須陀洹。斯陀含。阿那含。阿羅漢道。皆從善心。精進所致也。佛經言。人有誠信之心。可自得度世道。人能制止。却五所欲。自知身苦者。乃能得度世人。皆從智慧。成其道德。王言。善哉。善哉。王言。何等爲孝順者。那先言。諸善者。皆爲孝順。凡三十七品。經皆由於孝順爲本。王言。何等爲三十七品。經。那先言。有四意。止。有四意。斷。有四神。足。有五根。有五力。有七覺。意。有八種。道行。王復問。那先。言。何等爲四意。止者。那先報。王言。佛說。一爲身。身觀。二爲觀。痛。痒。痛。痒。止。三爲觀。意。意。止。四爲

觀法法止。是爲四意止。王復言何等爲四意斷。那先言佛說已分別止。四事不復念。是爲四意斷。以得四意斷。便自得四神足念。王復問何等爲四神足念。那先言一者。眼能徹視。二者。耳能徹聽。三者。能知他人心中所念。四者。身能飛行。是爲四神足念。王復問何等爲五根者。那先言一者。眼見好色。惡色。意不貪著。是爲根。二者。耳聞好聲。惡罵聲。意不貪著。是爲根。三者。鼻聞香臭。意不貪著。是爲根。四者。口得美味。苦辛。意不貪著。是爲根。五者。身得細滑。意不喜身得飽。堅意亦不惡。是爲五根。王復問何等爲五力者。那先言一能制眼。二能制耳。三能制鼻。四能制口。五能制身。令意不墮。是爲五力。王復問何等爲七覺意者。那先言一意覺意。二分別覺意。三精進覺意。四可覺意。五猗覺意。六定覺意。七護意。是爲七覺意。王復問何等爲八種道行。那先言一直見。二直念。三直語。四直治。五直業。六直方便。七直意。八直定。是爲八種道行。凡是三十七品經。皆由孝順爲本。那先言凡人負重。致遠有所成立。皆由地成。世間五穀樹木。仰天之草。皆由地生。那先言譬如師匠圖作大城。當先度量。作基址。已乃可起城。那先言譬如伎人欲作當先淨除地平。乃作佛弟子求道。當先行經戒。念善。因知勤苦。便棄諸愛。欲便思念八種道行。王言當用何等棄諸愛欲。那先言一心念道。愛欲自滅。王言善哉善哉。王復問言何等爲精進者。那先言持善助善。是爲精進。那先言譬如垣牆欲倒。從邊拄之。舍欲傾壞。亦復拄之。是爲精進。那先言譬如國王遣兵有所攻擊。兵弱欲不

如。王復遣兵往助之。兵便得勝。人有諸惡。如兵少弱。時人持善心。消滅惡心。譬如王增兵得勝。持五善心。消五惡心。譬如戰鬪得勝。是爲精進助善。如是那先言精進所助。致人善道。已得度世道。無有還期。王言善哉。王復問何等爲意當念諸善事者。那先言譬如人取異種華。以縷合連繫之。風吹不能散。那先復言譬如王守藏者。知王帑藏中金銀珠玉。瑠璃珍寶。有其多少。道人欲得道時。意念三十七品經。譬如正所謂念度世之道者也。人有道意。因知善惡。知當可行。知當不可行。分別白黑。自思惟。以後便棄惡就善。那先言譬如王有守門者。知王有所敬者。知王有所不敬者。知有利王者。知有不利王者。守門者知王所敬者。知利王者。便內之。知王不敬者。知不利王者。守門者即不內。那先言人持意亦如是。諸善者當內之。諸不善者不當內。守意制心。譬如如是。那先說經言人當自堅守護。其意及身中六愛。欲持意堅守。自當有度世。時王言善哉善哉。王問那先言何等爲一其心者。那先言諸善中獨有一心。最第一。人能一其心。諸善皆隨之。那先言譬如樓陛。當有所倚。諸善者皆著一心。那先言譬如王將四種兵。出行戰鬪。象兵。馬兵。車兵。步兵。皆導引王前後。佛諸經戒。及餘善事。皆隨一心。亦譬如兵。那先說經言。諸善中一心。爲本學道人。眾多皆當先歸一心。人身生死過去。如水下流。前後相從。無有住時。王言善哉。王復問何等爲智慧者。那先言我前說。已人有智慧。能斷諸疑。明諸善事。是爲智慧。那先言譬如持燈火入冥室。火適入室。便亡

其冥自明。明人有智慧。譬如火光。那先言譬如人持利刀。截木。人有智慧。能截斷諸惡。譬如利刀。那先言人於世間智慧。最爲第一。人有智慧。能得度脫生死之苦。王言善哉。王言那先前後所說經種種別異。但欲趣却一切惡耶。那先言然。佛經所說種種諸善者。但欲却一切惡也。那先言譬如王發四種兵。雖行戰鬪。初發行時。意但欲攻敵耳。佛所說經種種諸善。但欲共攻去一切惡耳。王言善哉善哉。那先說經甚快也。王復問那先言。人死所趣善惡之道。續持故身。神行生耶。更貿他神。行生耶。那先言亦非故身。神亦不離故身。神。那先因問王。身小時。哺乳時。身至長大時。續故身。非。王言小時。身異。那先言人在母腹中。始隨精時。至精濁時。故精耶。異也。堅爲肌骨時。故精耶。異也。初生時。至年數歲時。故精耶。異也。如人學書時。傍人寧能代其工不。王言不能代其工。那先言如人犯法。有罪。寧可取無罪之人代不。王言不可。那先以精神罪法語。王王意不解。王因言如人問那先。那先解之云。何。那先言我故小時。身耳。從小至大。續故身。爾大與小時。含爲一身。養是命所養。那先問王言。譬如人然。燈火寧至天明不。王言然。燈油至明。那先言燈中。炷火至一夜時。續故火光。不至夜半時。故火光。不至明時。故火光不。王言非。故火光。那先言然。燈從一夜至夜半。復更然。燈火耶。向晨時。復更然。燈耶。王言不。中夜起。更然。火續。故一炷火。至明耳。那先言人精神展轉相續。亦譬如是一者去。一者來。人從精神生。至老死後。精神更趣所向。生。展轉相續。是非。故精神亦不

離故精神。人死以後精神乃有所趣向生。那先言譬如乳漚化作酪。取酪上肥煎成醍醐。寧可取醍醐與酪上肥還復名作乳漚。其人語寧可用不。王言其人語不可用。那先言人神乳漚從乳漚成酪。從酪成肥。從肥成醍醐。人神亦如是。從精神生。從生至長。從長至老。從老至死。死後神更復受生。一身死當復更受一身。譬如兩主更相然。王言善哉善哉。王復問那先。人有不復於後世生者。其人寧能自知不。那先言然。有能自知者。王言用何知之。那先言其人自知無恩愛。無貪欲。無諸惡用。是故自知。後世不復生。那先問王。譬如田家耕犁種穀。多收斂著筥中。至後歲不復耕。不復種。但仰筥中穀食。其田家寧復望得新穀不。王言其田無所復望。那先言其田家何用。知不復得穀。王言其田家不復耕。不復種。故無所望。那先言得道亦如是。自知已棄捐恩愛。苦樂無有貪心。是故自知。後世不復生。王復言其人於後世不復生者。於今寧有智異於人不。那先言然。有智異於人。王言寧能有明不。那先言然。有明。王言智與明有異同乎。那先言智與明等耳。王言有智明者。寧悉知萬事不。寧有所不及。知不。那先言人智有所及。有所不及。王言何等為智。有所及。有所不及。那先言人前所不學。前所不及。知。人前所學。前所及。知。智者所見人及萬物。皆當過去。歸空。不得自在。人心所貪樂。皆種苦。本從是致苦。慧者知非常成敗之事。是智為異於人。王問言人。有智慧。癡愚所在。那先言人。有智慧。諸愚癡。皆自消滅。那先言。譬如人持燈火入冥室。室中皆明。冥即消滅。

智如是。人有智慧。諸癡愚。皆悉消滅。王言人智今為所在。那先言人行智以後。智便消滅。智所作者。故作。那先言。譬如人夜於火下。書火滅字。續在。智者如是。有所成已。智便消滅。其所作續在。王言智有所成已。便自滅。是何等語。那先言。譬如人備火。豫作戒火。五瓶水。如有失火者。其人持五瓶水。水滴滅火。火滅以後。其救火人。寧復望得完瓶。歸家用不。王言其人。不復望瓶。破火滅。豈復望瓶耶。那先言。道人持五善心。消滅諸惡。亦譬如瓶水滅火。王言何等為五善。那先言一者信善。有惡。二者不毀經戒。三者精進。四者有慧念善。五者一心念道。為是五善。人能奉行是五善者。便得智慧。便知身及萬物。非常。便知苦不得自在。便知空無所有。那先言。譬如醫師持五種藥。詣病者家。以藥飲病人。病者飲藥。得愈。醫寧復望得故藥。復行治人不。王言不復望得故藥。那先言五種藥者。如五善智。其醫者。如求道人。其病者。如諸惡。愚癡者。如病人。得道度世者。如病得愈。人智所成。致人度世。道人已得道。智亦自滅。那先言。譬如健鬪人。把弓持箭。前行向敵。以五箭射敵。得勝。其人寧復望箭。歸不。王言不復望箭。那先言五箭者。人五智也。智人從智得道。如健鬪得勝。敵家。諸惡者。如諸惡道人。持五善心。滅却諸惡。諸惡皆滅。善智即生。人從善智得成度世。道者。常在不滅。王言善哉。王言。如人得道。後世不復生者。後寧復更苦不。那先言。或有更苦者。或有不更苦者。王言更苦不更苦云何。那先言。身更苦耳。心意不更苦。王言。身更苦心。意不更苦云何。那先言。身所以

更苦者。其身見在。故更苦心。意棄捐。諸惡。無有諸欲。是故不復更苦。王言。假令得道人。不能得離身苦者。是為未得泥洹道耶。王言。人得道已。無所恩愛。身苦。意安。何用為得道。王言。假令人得道已。成當復何留。那先言。譬如食物未熟。不強熟也。已熟。亦無所復待。那先言。王屬所道者。舍犁曰。所說舍犁曰。在時言。我亦不求死。我亦不求生。我但須時可時。至便去。王言善哉善哉。那先比丘經卷上

那先比丘經卷中

失譯人名附東晉錄

王問人更樂者為善耶。不善也。人更苦為善耶。為不善也。佛得無不說有樂或有苦。王言。如使有為無有苦。那先問王言。如人燒鐵著手中。寧燒人手不。復取水著手中。其水寧復燒人手不。王言。然。兩手皆威也。那先問王言。如是。兩手中物皆熱耶。王言。不兩熱。那先言。兩冷耶。王言。不兩冷也。那先言。兩手中皆燒。那先言。我重問王。王前後兩熱。當言兩熱。兩冷。當言兩冷。何緣一冷一熱。能同言燒人手乎。王言。智慮甚淺。近不能及是難也。願那先為我解之。那先言。佛經說之。凡有六事。令人內喜。有六事。令人內愁。復有六事。令人不喜。亦不愁。外復有六事。令人愁。王

問何等爲六事。令人內喜。那先言。一者目有所視復有所望。是故令人內喜。二者耳聞好聲復有所望。是故令人內喜。三者鼻聞好香復有所望。是故令人內喜。四者舌得美味復有所望。是故令人內喜。五者身得細滑復有所望。是故令人內喜。六者心得樂受復有所望。是故令人內喜。如是六事令人內喜。王復問何等爲外六事。令人喜。那先言。一者眼見好色。念之不可常得。皆當棄捐。便自思惟。審然無常。是故令人外喜。二者耳聞好聲。念之不可常得。皆當棄捐。是故令人外喜。三者鼻聞好香。念之不可常得。皆當棄捐。是故令人外喜。四者口得美味。念之不可常得。皆當棄捐。是故令人外喜。五者身得細滑。念之不可常得。皆當棄捐。是故令人外喜。六者心念愛欲。思惟念之。是皆無常。皆當棄捐。念之。是以後更喜。是爲六事。令人外喜。王復問何等爲內六事。令人內愁。那先言。一者令人內愁者。目所不喜而見之。令人內愁。二者耳不欲所聞而聞之。令人內愁。三者鼻不欲所嗅而嗅之。令人內愁。四者口不欲所得而得之。令人內愁。五者身不欲所著而著之。令人內愁。六者心不可所喜而有之。令人內愁。是爲六事。令人內愁。王復問何等爲外六事。令人不喜。那先言。一者目見惡色。令人不喜。二者耳聞惡聲。令人不喜。三者鼻聞臭腥。令人不喜。四者舌得苦辛。令人不喜。五者身著麤堅。令人不喜。六者心有所憎。令人不喜。是爲外六事。令人不喜。王復問何等爲六事。令人不喜。那先言。一者目有所見。亦不喜不愁。二者耳有所聞。音亦不喜不愁。

三者鼻有所嗅。亦不喜不愁。四者口有所得。亦不喜不愁。五者身有所觸。亦不喜不愁。六者心有所念。亦不喜不愁。是爲內六事。令人不喜不愁。王復問何等爲外六事。令人愁者。那先言。一者目所見死者。因自念身及萬物無常。其人自念言。我有是念。何以不得道。因外愁。二者耳不樂好音。其人自念言。我有是念。何以不得道。因外愁。三者鼻不喜臭香。其人自念言。我有是念。何以不得道。因外愁。四者口不味苦甜。其人自念言。我有是念。何以不得道。因外愁。五者身不好細滑。亦不得麤堅。其人自念言。我有是念。何以不得道。因外愁。六者心不喜愛欲。其人自念言。我有是念。何以不得道。因外愁。是爲六事。令人外愁。王言善哉善哉。王復問那先人生。王問那先故人名。身行生耶。那先言不也。非故名。亦非故身。持是名。身於今世作善惡。乃於後世生耳。王言如使今世用是名。身作善惡。於後世身不復生者。極可作善惡。徑可得脫。不復更諸苦耶。那先言於今世作善。後世不復生者。便可得脫。無耶。人作善惡。不止當後生耳。是故不得脫。那先言。譬如人盜他人果。其主得盜果者。將至王前。白言。是人盜我果。其盜者言。我不盜。是人果。是人所種小栽耳。本不種果也。我自取果。我何用爲盜。我不盜。是人果。我不應有罪過。那先問王言。如是兩人共爭。誰爲直者。誰不直者。王言種栽家爲直。本造所種盜者無狀。應爲有罪。那先言盜何用爲有罪。王言所以盜者。有罪。本種栽家所種。從栽根生。故上有果耳。

那先言人生亦譬如。是人今世用是名。身作善惡。乃生於後世。今世作善惡者。是本也。那先言。譬如人盜他人禾稔。其主得盜。便牽問之。汝盜我禾稔。爲盜者言。我不盜。卿禾稔。卿自種。禾我自取。稔我何用爲犯盜。兩人相牽。至王前。白如是。誰爲直者。誰爲不直。王言種禾穀爲直。盜者爲不直。那先言。何以知盜禾稔者爲不直。王言是種禾者爲本。有不種禾者爲無緣。何有稔。那先言人生亦譬如。是人今世用是名。身作善惡。乃生於後世。今世作善惡者。是其本也。那先言。譬如人冬寒於一舍中。然火欲自溫炙。其人棄火而去。稍稍然。及壁土燒。屋連及樓舍。舍主因言。起火者。牽至王前。白言。是人起火。延及燒我樓舍。然火者言。我然小火。自溫炙耳。我不燒樓舍。那先問王。誰爲直者。王言本然火者爲不直。本所生也。那先言人生亦爾。譬如人今世用是名。身作善惡。乃生於後世。今世作善惡者。是本也。那先言。譬如人夜然燭火。著壁欲用自照。飯食。燭稍却。及壁上及竹木。材便燒。一舍火大熾。延及燒一城中。舉城中人民共咈言。汝何爲燒一城中。乃如是。然火者言。我但然小燭火。以自照飯食耳。是自大火。非我火也。如是便共爭訟。相牽至王前。那先問王言。如是誰爲直者。誰爲不直者。王言然火者爲不直。那先言。何以知令火燒一城中。那先言。人生亦譬如。是人今世用是名。身作善惡。乃生於後世。今世作善惡者。是其本也。人用不知作善惡。故不能得度脫。那先言。譬如人以錢。媵求人家小女。以後女長大

他人復更求媾求女得女以爲婦。前所媾家來自說言。汝反取婦爲後家言。汝自小時媾女我。自大時媾婦我何用爲嬰汝婦耶。便相牽詣王前。那先言王如是誰爲直者。誰爲不直者。王言前媾家爲直。那先言王何以知。王言是女本小。今稍長大是故知爲直也。是前媾家婦也。那先言人生亦譬如人。今世用是名身作善惡。乃生於後世。今世作善惡者是其本也。那先言譬如人持瓶從牧牛家買乳。得乳已復還寄其主。言我今還。不久其人須與來。還取瓶。還以轉作酪。買滯家言。我持滯寄卿。今反持酪還我。牧牛者言是汝故乳。今自轉爲酪。兩人因共爭訟相牽詣王前。那先問王言如是誰爲直者。王言牧牛家爲直。那先言王何以知。王言汝自買滯。停置地自轉成酪。牧牛家當有何過。那先言人生亦譬如人。今世用是名身作善惡。乃生於後世。今世作善惡者是其本也。王復問。那先當復於後世生耶。那先報王言用是爲問我。前說已如使我有恩愛者。後世當復生。如使我無恩愛者。不復生。那先言譬如人竭力事王。王當知其善。使賜其財物。其人得物極自施用。衣被飲食歡樂自樂。其人論議言。我有功於王。王未曾有賞賜我也。那先問王如彼人得賞賜。反言未曾得其人語。寧可用不。王言其人語不可用。那先言是故我語王言。如使我有恩愛者。當復於後世生。如使我無恩愛者。不復於後世生。王言善哉善哉。王問那先言。卿前所說人名與身何等爲名。何等爲身者。那先言今見在爲身心所念者爲名。王復問人何故有名。行於後世

生而身不行生。那先言人身以名前後相連。譬如鷄子中汁及與上皮乃成鷄子。人名與身相連。如是不分也。王言善哉。王復問那先何等爲久者。那先言以過去事爲久。當來事亦爲久。見在事爲無有久。王言善哉。王復問那先言。審爲有久不。那先言。或有久或無有久。王復言。何等爲有久。何等爲無有久。那先言。其得道泥洹者爲無久。未得道當復更死生者爲有久。人於今世好布施孝於父母於當來世當得其福。王言善哉善哉。王復問那先言。諸以過去事當來事。今見在事是三事何所爲本者。那先言已過去事當來事。今見在事。愚癡者是其本也。愚癡生即生。神生身生。名生。色生。六知。一爲眼知。二爲耳知。三爲鼻知。四爲口知。五爲身知。六爲心知。是爲六知。是六事皆外向。何等爲外向。眼向色。耳向聲。鼻向香。口向味。身向滑。心向貪。欲是爲六外。向名爲沛。沛者合沛者。知苦知樂。從苦樂生恩愛。從恩愛生貪欲。從貪欲生有致便生。因老。從老因病。從病因死。從死因哭。從哭因憂。從憂因內心痛。凡合是諸勤苦。合名爲人。人。以是故生死無有絕時。人故本身不可得也。那先言譬如人種五穀。生根從根生。莖葉實至後得穀已。後年復種得穀甚多。那先問王如人種穀。歲歲種穀。寧有絕不生時不。王言歲歲種穀。無有絕不生時也。那先言人生亦如是。展轉相生。無有絕時。那先言譬如鷄生卵。卵生鷄。從卵生卵。從鷄生鷄。人生死亦如是。無有絕時。那先便畫地作車輪。問王言。今是輪寧有角無。王言正圓無有角。那先言佛經說人生死如車

輪展轉相生。無有絕時。那先言人從眼萬物色。識即覺知。是三事合。從合生苦樂。從苦樂生恩愛。從恩愛生貪欲。從貪欲生因有致從有致。因生從生。因作善惡。從善惡便生。耳聞聲。識即覺知。三事合。從合生苦樂。從苦樂生恩愛。從恩愛生貪欲。從貪欲生因有致從有致。因生從生。因作善惡。從善惡便生。口得味。識即覺知。三事合。從合生苦樂。從苦樂生恩愛。從恩愛生貪欲。從貪欲生因有致從有致。因生從生。因作善惡。從善惡便生。身得細滑。識即覺知。三事合。從合生苦樂。從苦樂生恩愛。從恩愛生貪欲。從貪欲生因有致從有致。因生從生。因作善惡。從善惡便生。意有所念。識即覺知。三事合。從合生苦樂。從苦樂生恩愛。從恩愛生貪欲。從貪欲生因有致從有致。因生從生。因作善惡。從善惡便生。那先言人展轉相生。無有絕。王言善哉。王復問那先。卿言人生死不可得。本不可得。本意云何。那先言有本者。當不復生。有本者當復過去。用是爲本。王言無本者。當不復生。見有本者。當過去。如是本爲未絕耶。那先言然。皆當過去。王復問那先。人生死寧有從旁增益者不。那先問王言。世間人及蚊行蠕動之類。寧有從旁增益者不。王言我不問那先。世間人及蚊行蠕動之類。我但欲問卿。人生死本耳。那先言樹木生以栽爲本。五穀生以穀爲本。天下萬物皆各以其類本生。人從六情恩愛爲本。那先言人有眼有色。有識。有耳。有聲。

有識。有鼻有香有識。有舌有味有識。有身有細滑有識。有念有法有識。從是生苦樂從苦樂生恩愛。從恩愛生貪欲。從貪欲生合是諸苦。乃成爲人耳。眼耳鼻口身神識。念使有致。并合爲沛。從沛生苦樂。從苦樂生恩愛。從恩愛生貪欲。從貪欲因生有致。從有致因生。從生因老因病。從病因死。因憂從憂。因哭從哭。因內心痛。人生如是。那先言無眼不見色。不覺不知。從不覺不知。無有合。無有合。無有苦樂。無有苦樂。便不生恩愛。無恩愛不生貪欲。無貪欲無有致。無有致不生不老。不生不老不病不死。不病不死不憂不哭。不哭不內心痛。無是諸苦。便度脫得泥洹道。無耳無所聞。無鼻無所嗅。無口無所味。無身無細滑。無識無所念。無所念無沛。無沛無苦樂。無苦樂無恩愛。無恩愛無貪欲。無貪欲無胎。無所胞胎。無所生不生不老不病不病不死。不死不憂不哭不哭不內心痛。捐棄諸苦。便得泥洹道。王言善哉。王復問那先言世間寧有自然生物無。那先言無有自然生物。皆當有所因。那先因問王。今王所坐殿有人功夫作之耶。自然生乎。王言人功作之材。椽出於樹木。垣牆泥土出於地。那先言人生亦如是。界如和合乃成爲人。是故無自然生物也。皆有所因。那先言譬如窯家作器。取土水和以爲泥。燒作雜器物。其泥不能自成爲器。會當須人工有薪火乃成爲器耳。世間無有自然生者也。那先語王言譬如箠篋無絃。無柱無人鼓者。寧能作聲不。王言不能自作聲。那先言如使箠篋有絃。有柱有人工鼓者。其聲寧出不。王言有聲。那先言

如是天下無自然生物。皆當有所因。那先問王如鑽火。燧無兩木無人鑽者。寧能得火不。王言不能得火。那先言設有兩木有人鑽之。寧能生火不。王言然即生火。那先言天下無有自然生物。皆當有所因。那先問王言譬如陽燧。鉤無人持之。亦無日無天。寧能得火。那先言如陽燧有人持之。有日有日。寧能得火不。王言得火。那先言天下無有自然生物。皆當有因。那先問王言若人無鏡。無明人欲自照。寧能自見其形不。王言不能自見。那先言如有有鏡。有明有人自照。寧能自見其形不。王言然即能自見。那先言天下無有自然生物。皆當有所因。王言善哉。王復問那先世間人寧爲有人無。那先言世間不能審有人也。適當呼誰爲人。王言身中命即爲人。不。那先問王。身中命能用眼視色。不能用耳聽音聲。不能用鼻聞香。不能用舌知味。不能用身知細滑。不能用意有所知不。王言能。那先言今我與王其於殿上四面有窓。自在欲從何窓者。寧能見不。王言得見。那先言設令人命在身中。自在欲從何孔視耳。能以眼視色。不能用耳視色。不能用鼻視色。不能用口視色。不能用身視色。不能用意視色不。王言不能。那先言設令命在耳。能以耳有所聞。不能以耳有所見。不能以耳知香臭。不能以耳知味。不能以耳知細滑。不能以耳有所念不。那先言設令命在鼻。能以鼻知香臭。不能以鼻聞音聲。不能以鼻知味。不能以鼻知細滑。不能以鼻有所念不。那先言設令命在口。能以口知味。不能以口有所見。不能以口聽音聲。不能以口聞臭香。不能以口知細滑。不

能以口有所念不。那先言設令命在身中。能以身知細滑。不能以身有所見。不能以身聽音聲。不能以身知臭香。不能以身知味。不能以身有所念不。那先言設令命在識。能以識有所念。不能以識聽音聲。不能以識知臭香。不能以識知味。不能以識知細滑不。王言不能知也。那先言王所語前後不相副。那先言如我與王共在殿上坐。徹壞四窓者。視寧廣遠不。王言然廣遠。那先言設令命在身中。捩眼去之。其視寧廣遠不。決耳令大其聽。寧能遠不。決鼻令大聞香。寧能遠不。決口令大知味。寧能多不。副剝皮膚。知細滑寧多不。決判去意。其令寧大不。王言不也。那先言王亦語前後不相副。那先問王言王持藏人來入在王前住。王寧覺知在前住不。王言知在前。那先言持藏者即入王室。寧知入室不。王言知入室也。那先言設令人命在身中人持味著口中。能知甜醋酸鹹辛苦。王言知之。那先言王所語前後不相副也。那先言如人沽美酒著大器中。急塞一人口。倒置酒中。令嘗酒。其人寧知酒味不。王言其人不知。那先言何以故。不知味。王言未入口到舌上。故不知味。那先言王所語前後不相副。王言我愚癡智未及是。難願相解之。那先言人從眼見色。神動。神動即生苦樂。意念合耳鼻口身意。皆同合爲意。有所念。神動。神動即生苦樂。從苦樂生意。從生念。展轉相成。適無常主。王言善哉。王復問那先人生眼時。眼與神俱生耶。那先言然。同時俱生。王復問眼居前生耶。神居前生耶。那先言眼居前生。神居後生。王言眼語神言。我所行生處。汝當隨我後生。

相語言兩耶。神語眼言汝所生處。我當隨汝後。生兩相語不。那先言兩不相與語。王言卿不言同時俱生何以故不相語。那先言有四事俱不相語。那先自言何等四。一爲下行二爲向門三爲行轍四者爲數。是四事俱不相語。王復問何等爲下行者。那先報王言高山上天雨其水隨流當如何行。王言下行。那先言後復天雨其水流當復如何行。王言當隨前流水處行。那先問王言。前水寧語後水言。汝當隨我後來。後水寧語前水言。我當隨汝處流行。前水後水相語言爾不。王言水流各自行。前後不相語也。那先言眼亦如水。眼不語神言。汝當隨我後生。神亦不語眼言。我當隨汝後行生也。眼與神俱不相語也。是名爲下行。耳目鼻口身意亦爾。王復問何等爲向門者。那先言譬如大城都有一門。其中有一人欲出當從何向。王言當從門出耳。那先言後復有一人欲出當從何向。王言故當從前一人門出耳。那先言王前出人寧語後人言。汝當隨我後出。後人寧語前人言。我當隨卿所從門出。兩人寧相語言爾不。王言前人後人俱不相語也。那先言眼亦如門。眼不語神言。汝當隨我後生。神亦不語眼言。我今當隨汝後生。眼與神俱不相語也。是爲向門。耳鼻口身意亦爾。王復問那先言何等爲轍行者。那先問王言。前車行有轍後車行當從何所行。王言後車當從前車轍中行。那先言前車輪寧語後輪言。汝當隨我處從後來。後車輪寧語前輪。我當隨汝處行。寧相語言爾不。王言俱不相語也。那先言人亦如是。眼不語神。我所生處。汝當隨我生。神

亦不語眼。我當隨卿後生。那先言耳鼻口身神俱不相語。王復問那先何等爲數。那先言數者校計也。書疏學問是爲數。耳目鼻口身神稍稍習知共合。是六事乃爲有所知。不從一事有所知也。王言善哉。王復問那先言。人目生時與苦樂俱生不。那先言目與苦樂俱生皆根從合生。王復言何等爲合者。那先言兩相觸爲合。合者譬如兩羊相抵是爲合。一羊如目一羊如色。合爲名。沛譬如一手爲目一手爲色。兩手合爲沛。譬如兩石一石爲目一石爲色。兩石合爲沛。耳目鼻身神皆同合爲沛。譬如兩石一石如神一石如志。兩石合爲沛。神志合如是。是名爲沛。王言善哉。王復問那先。樂何等類。那先言自覺知爲樂。那先言譬若人事國王。其人賢善。王賜與財物。其人得之。用自快樂。在所欲爲。其人自念。我事王得賞賜。今得樂樂如是。那先言譬如人心念善。口言善。身行善。行善如是。死後得生天上。其人於天上極意自娛樂。自念言。我在世間時。心念善。口言善。身行善。是故我自致生此間。得樂甚樂。是爲覺。王言善哉。王復問那先。何等爲覺者。那先言從知爲覺。譬如王有持藏者。入藏室中。自視室中。自知有若干錢。金銀珠玉。繒帛雜香。色皆知雜處。是爲覺。知。王言善哉。王復問那先言。人有所念何等類。那先言人有所念。因有所作。譬如人和毒藥。自飲。亦復行飲人。身自苦。亦復苦他人。身。那先言譬如人作惡。死後當入泥犁中。諸所教者。皆入泥犁中。惡人有所念。所作言如是。王言善哉。王復問那先言。何等爲內動者。那先言志念內便動。王言動行時云

何。那先言譬如銅銅釜。有人往燒之。其器有聲。舉乎有餘音。而行人如是。志動念。因行。那先言。燒時爲動。有餘音爲行。王言善哉。王復問那先言。能合取分別之。不。是爲合。是爲智。是爲念。是爲意。是爲動。那先言假令以合不可復分別也。那先言王使宰人作美羹。中有水。有肉。有葱。蒜。有薑。有鹽。鼓。有糲。王勅廚下人言。所作美羹。如前取羹中水味來。次取葱味來。次取薑味來。次取鹽鼓味來。次取糲味來。羹以成人。寧能一一取羹味與王不。王言羹一合以後不能一一別味也。那先言諸事亦如是。一合不可別也。是爲苦樂。是爲智。是爲動。是爲念。王言善哉。善哉。王復問那先言。人持目視鹽味。寧可別知不。那先言王知。乃如是耶。能持目視知鹽味。王言目不知鹽味耶。那先言人持舌能知鹽味。取不能以目知鹽味也。王復言人用舌知味云。那先言人皆用舌別知味。王言諸鹽味皆當用舌別知耶。那先言然。諸鹽味皆當用舌別知耳。王復問那先言。車載鹽。牛輓鹽。車牛寧能別知鹽味不。那先言。車牛不能別知知鹽味也。王問那先言。鹽味寧可稱不。那先言。王智。乃爾能稱鹽味。王問那先言。鹽味不可稱也。其輕重可稱耳。王言善哉。王復問那先。凡人身中五知作眾事所成。非一事所成也。譬如一地五穀當生時。各自生動。類人身中五事皆用眾事各所生。王言善哉。善哉。王復問那先。世間人頭鬚髮。膚。面目。耳鼻。口。身體。四支。手足。皆完具。何故中有壽命長者。中有短命者。有多病者。中有少病者。中有貧者。中

有富者。中有貴者。中有賤者。中有大士者。中有小士者。中有端正者。中有醜者。中有爲人所信者。中有爲人所疑者。中有明孝者。中有愚者。何故不同。那先言。譬如諸樹木果。眾中有醋不甜者。中有苦者。中有辛者。中有甜者。中有正醋者。那先問王言。是皆樹木何故不同。王言。所以不同者。其裁各自異。那先言人亦如是。心所念者。各各異。是故令世間人不同耳。中有短命者。中有長命者。中有多病者。中有少病者。中有富者。中有貧者。中有貴者。中有賤者。中有大士者。中有小士者。中有端正者。中有醜者。中有語用者。中有語不用者。中有明者。中有愚者。那先言。是故佛所言。隨其人作善惡。自當得之。中有豪貴者。中有貧窮者。皆是前世宿命。世作善惡。各自隨其德得之。王言善哉善哉。王復問那先言。人有欲作善者。當前作之耶。當後作之乎。那先言。當居前作之。在後作之。不能益人也。居前作者。有益於人。那先問王言。王渴欲飲時。使人掘地作井。能赴王渴不。王言不赴渴也。當居前作井耳。那先言人亦如是。人所居皆當居前。在後作者。無益也。那先問王。王飢時。乃使人耕地糞地種穀。飢寧用飯耶。當豫有儲。王言不也。當先有儲貯。那先言人亦如是。當先作善。有急乃作善者。無益身也。那先問王。譬如王有怨。當臨時出戰鬪。王能使人教馬。教象。教人作戰鬪具乎。王言不也。當宿有儲貯。臨時便可戰鬪。臨時教馬。教象。教人無益也。那先言佛經說言。人當先自念身作善。在後作善無益也。那先言王莫棄大道。就邪道。無效。愚人棄善作惡。後坐啼哭無所

益也。人家棄捐忠正。就於不正。臨死時悔在後。王言善哉善哉。王復問那先。卿曹諸沙門言。世間火不如泥犁中火熱也。卿曹復言。持小石著世間火中。至暮不消也。卿曹復言。極取大石著泥犁火中。即消盡。是故我不信也。卿曹復言。人作惡死在泥犁中。數千萬歲。其人不消死。是故我重不信是語也。那先問王。王寧聞見水中有雌。麟。蛟。雌。鼈。雌。蟹。懷子以沙石爲食不。王言然。皆以是爲食。那先問王。沙石在腹中。寧消不。王言然。皆消。那先言其腹中懷子。寧復消不。王言不消也。那先言何以故不消。王言相祿獨當。然故不消。那先言泥犁中人亦如是。數千萬歲。不消死者。其人所作罪過未盡。故不消死。那先問王言。雌。師。子。雌。虎。雌。狗。雌。貓。懷子。皆肉食。噉骨入腹中。時寧消不。王言皆消盡。那先問王言。其腹懷子。寧復消不。王言不消也。那先言用何故不消。王言獨用祿相。故不消也。那先言泥犁中人亦如是。數千萬歲。不消死者。泥犁中人所作過惡未解。故不消死。那先問王言。雌。牛。雌。馬。雌。驢。雌。麋。雌。鹿。懷子。皆食草。芻爲餐不。王言然。皆以是爲食。那先言其芻草。寧於腹中消盡不。王言皆消盡。那先言其腹中子。寧消盡不。王言不消盡也。那先言何故不消盡。王言獨以相祿。當然故使不消盡。那先言泥犁中人亦如是。是罪過未盡。故不消死。那先問王言。夫人及長者。富家女。飲食皆美。恣意食。食於腹中。寧消不。王言皆消。那先問王言。腹中懷子。寧消不。王言不消也。那先言何以故不消。王言獨相祿。故使不消也。那先言泥犁中人亦如是。所以數千歲不

消死者。用先世作惡。故未解。故不消死。那先言人在泥犁中。長在泥犁中。老過盡。乃當死。王言善哉。王復問那先。卿曹諸沙門言。天下地皆在水上。水在風上。風在空上。我不信是也。那先便前取王書水。適以三指撮舉之。問王言。是中水爲風所持不。王言然。爲風所持。那先言風持水亦如是。王言善哉。王復問那先言。泥洹道皆過去無所復有耶。那先言泥洹道無所復有也。那先言愚癡之人。徑來索內外身愛。坐是故不能得度脫於老病死。那先言智者學道人。內外身不著也。人無有恩愛。無有恩愛者。無貪欲。無貪欲者。無有胞胎。無有胞胎者。不生不老。不生不老。不病不死。不病不憂。不憂不哭。不哭不內心痛。便得泥洹道。王言善哉。王復問那先言。諸學道者。悉能得泥洹道不。那先言不能悉得泥洹道也。正向善道者。學知正事。當所奉行。者。奉行不當。奉行不當。奉行者。遠棄之。當所念者。念不當。所念者。棄之。人如是。者。得泥洹道。王言善哉。王復問那先。人不得泥洹道者。寧知泥洹道爲快不。那先言然。雖未得泥洹道。由知泥洹道爲快也。王言人未得泥洹道者。何以知爲快耶。那先問王言。人生未嘗截手足爲痛處。王言人雖未嘗更截手足。由知爲痛也。那先言何用知爲痛也。王言其人截手足時。呻呼用是知爲痛。那先言人亦如是。前得泥洹道者。轉相語泥洹道快。用是故信之。王言善哉。王復問那先。那先寧曾見佛不。那先言未曾見也。王言那先諸師。寧曾見佛不。那先言諸師亦不見佛也。如使那先及諸師不見佛者。定爲無有佛也。那先問王言。王見五

百水所合聚處不。王言我不見也。那先言王父及太父皆不見此五百水合聚處。天下定爲無此五百水所聚處耶。王言雖我父及太父皆不見此水者。實有此水。那先言雖我諸師不見佛者。其實有佛。王言善哉。

那先比丘經 卷中

那先比丘經 卷下

失譯人名附東晉錄

王復問言。無有復勝佛者耶。那先言然。無有勝佛者。王復問。何以知爲無有勝佛者。那先問王。如人未曾入大海中。寧知海水爲大不。有五河。河有五百小河流入大河。一者名恒。二者名信他。三者名私他。四者名諱叉。五者名施披夷。爾五河水晝夜流入海。海水亦不增不減。那先言。王寧能聞知不。王言實知。那先言以得道人共道說。無有能勝佛者。是故我信之。王言善哉。王復問那先。何用知無有能勝佛者。那先問王。造作書師者爲誰。王言造書師者名質。那先言。王寧曾見質不。王言質以死久遠未曾見。那先言。王未曾見質。何用知質爲造書師。王言持古時書字轉相教告。用是故我知名爲質。那先言。用是故我曹見佛經戒。如見佛無異。佛所說經

道甚深快。人知佛經戒已後。便轉相教。用是故。我知爲無有能勝佛者。王復問那先。自見佛經道可久之。那先言。佛所施教。禁經戒甚快。當奉行之。至老。王言善哉。王復問那先。人死已後。身不隨後世生耶。那先言。人死已後。更受新身故。身不隨。那先言。譬如燈中炷更相然。故炷續在新炷更然。人身如是。故身不行。更受新身。那先問王。王小時從師學書。讀經不。王言然。我續念之。那先問王。王所從師受經書。師寧復知。本經書耶。悉舊得其本經書。王言不也。師續自知。本經書耳。那先言。人身如此。置故更受新身。王言善哉。王復問那先。審爲有智無。那先言。無有智。那先言。譬如人盜他人果。竊盜者寧有過無。王言有過。那先言。初種栽時。上無果。何緣盜者。當有過。王言。設不種栽。何緣有果。是故盜者無狀。那先言。人亦如是。用今世作善惡。生於後世。更受新身。王言。人用是故。身行作善惡。更新善惡所在。那先言。人諸所作善惡。隨人。如影隨身。人死但亡其身。不亡其行。譬如然火。晝滅。其字續在。火至復成之。今世所作行。後世成。如受之如是。王言善哉。王言。那先寧能分別指視善惡所在不耶。那先言。不可得知善惡所在。那先問王。樹木未有果時。寧能分別指視言。其枝間無有果。寧可豫知之不耶。王言不可知。那先言。人未得道。不能豫知善惡所在。王言善哉。王復問人。當於後世生者。寧能自知不。那先言。其當生者。自知。王言何用知之。那先言。譬如田家耕種。天雨時節。其人寧豫知當得穀不。王言然。猶知當得穀多。那先言。人亦如是。人當於

後世生。豫自知。王言善哉。王復問那先。審有泥洹無。那先言。審有。王言。那先寧能指示我佛在某處不。那先言。不能指示。佛在某處。佛以般泥洹去。不可得指示。指示見處。那先言。譬如人然大火。以即滅其火。火寧可復指示知光所在不。王言不可知處。那先言。佛以般泥洹去。不可復知處。王言善哉。王復問那先。沙門寧。自愛其身不。那先言。沙門不自愛其身。王言。如令沙門不自愛其身者。何以故。自消息臥。欲得安溫軟。飲食欲得美善。自護視。何以故。那先問王。寧曾入戰鬥中不。王言然。我曾入戰鬥中。那先言。在戰鬥中。曾爲刀。刀箭所中不。王言。我曾頗爲刀。刀所中。那先問王。刀。刀。刀。箭。箭。箭。奈何。王言。我以膏藥綿絮裹耳。那先問王。王爲愛瘡。故以膏藥綿絮裹耳。王言。我不愛瘡。那先言。殊不愛瘡者。何以持膏藥綿絮裹以護之。王言。我欲使疾愈耳。不愛其瘡。那先言。沙門亦如是。不愛其身。雖飲食。心不樂。不用作美。不用作好。不用作肌色。趣欲支身體。奉行佛經戒耳。佛經說言。人有九孔。爲九矛瘡。諸孔皆臭。處不淨。王言善哉。王復問那先。佛爲審有三十二相。八十種好。身皆金色。有光影耶。那先言。佛審有三十二相。八十種好。皆有金色。有光影。王言。佛父母寧復有三十二相。八十種好。身皆金色。有光影耶。那先言。佛父母無是相。王言。如使父母無是相者。佛亦無是相。王復言。人生子。像其種類。父母無是相者。佛定無是相。那先言。佛父母雖無是相。三十二相。八十種好。身金色者。佛審有是相。那先問王。王曾見蓮華不。王言。我見之。那先言。此蓮華

生於地。長於泥水之中。色甚香好。寧復像類泥水色不。王言不像類地泥水色。那先言雖佛父母無是諸相者。佛審有是諸相。佛生於世間長於世間。而不像世間之事。王言善哉。王復問那先。佛審如第七天王梵所行。不與婦女交會不。那先言然。審離於婦女。淨潔無瑕穢。王言假令佛如第七天王所行者。佛爲第七天王梵弟子。那先問王。第七天王者有念無念。王言第七天王梵有念。那先言是故第七天王梵及上諸天皆爲佛弟子。那先問王言。鳥鳴聲何等類。王言鳥鳴聲如鴈聲。那先言如是。鳥爲是鴈。弟子各自異類。佛亦如是。非第七天王梵弟子。王言善哉。王復問那先。佛寧悉學知奉行經戒不。那先言佛悉學知奉行經戒。王言佛從誰師受經戒。那先言佛無師。佛得道時便悉自知諸經道。佛不如諸弟子學知佛所教。諸弟子皆當奉行至老。王言善哉。王復問那先。人父母死時悲啼哭淚出。人有聞佛經。亦復悲啼淚出。俱淚出寧有別異不。那先言人有父母啼泣皆感恩愛思念。愁憂苦痛。此曹憂者愚癡憂耳。其有聞佛經道淚出者。皆有慈哀之心。念世間勤苦。是故淚出其得福甚大。王言善哉。王復問那先。以得度脫者。未得度脫者。有何等別異。那先言人未得度脫者。有貪欲之心。人得度脫者。無有貪欲之心。但欲趣得飯食支命耳。王言我見世間人。皆欲快身欲得美食。無有厭足。那先言人未得度脫者。飯食用作榮樂好。人得度脫者。雖飯食不以爲樂。不以爲甘。趣欲支命。王言善哉。王復問那先。人家有所作。念久遠之事不。那先言人愁憂

時。皆念久遠之事。王言用何等念之。用志念耶。用念念耶。那先問王言。寧曾有所學知以後念之。不。王言然。我曾有所學知。以後復忽忘之。那先言。王是時無忘耶。而忘之乎。王言。我時妄念。那先言。可差。王爲有象。王復問那先。人有所作。皆念。如甫始有所作。今見在所作皆用念知耶。那先言。已去之事。皆用念知之。今見在之事。亦用念知之。王言。如是。人但念去事。不能復念新事。那先言。假令新者有所作。不可念者亦如是。王言。人新學書技巧。爲唐捐耶。那先言。人新學書畫者。有念。故令弟子學者。有知。是故有念耳。王言善哉。王復問那先。人用幾事生念耶。那先言。人凡有十六事生念。一者久遠所作生念。二者新有所學生念。三者若有大事生念。四者思善生念。五者曾所更苦生念。六者自思惟生念。七者曾雜所作生念。八者教人生念。九者像生念。十者曾有所忘生念。十一者因識生念。十二者校計生念。十三者負債生念。十四者一心生念。十五者讀書生念。十六者曾有所寄更見生念。爲十六事生。一。王復問那先。何等爲念久者。那先言。佛弟子阿難女弟子優婆夷鳩雛單罷。念億世宿念時事。及餘道人皆能念去世之事。如阿難女弟輩甚眾多。念此以便生念。二。王復問。何等爲新所學生念者。那先言。如人曾學知校計。後復忘之。見人校計便更生念。三。王復問那先。何等爲大事生念者。那先言。譬如太子立爲王。自念爲王豪貴。是爲大事生念。四。王復問那先。何等爲思善生念者。那先言。譬如爲人所請呼極善意賓。遇待之。其人自念言。昔日爲某

所請呼善意待人。是爲思善生念。五。王復問那先。何等爲更苦生念。那先言。譬如人曾爲人所搗捶閉繫牢獄。是爲更苦生念。六。王復問那先。何等爲自思惟生念者。那先言。譬如曾有所見。若家室宗親及畜生。是爲自思惟生念。七。王復問那先。何等爲曾雜所作生念者。那先言。譬如人名萬物字類。色香臭甜苦。念此語事。是爲雜生念。八。王復問那先。何等爲教人生念者。那先言。人自喜忘邊人。或有者或忘者。忘爲教人生念。九。王復問那先。何等爲像生念者。那先言。人牛馬各自有像類。是爲像生念。十。王復問那先。何等爲曾所忘生念者。那先言。譬如人卒有所忘。數數獨念得之。是爲曾所忘生念。十一。王復問那先。何等爲因識生念者。那先言。學書者能求其字。是爲因識生念。十二。王復問那先。何等爲校計生念者。那先言。如人共校計成就。悉知策術分明。是爲校計生念。十三。王復問那先。何等爲負債生念者。那先言。譬如顧鼓所當債歸。是爲債局生念。十四。王復問那先。何等爲一心生念者。那先言。沙門一其心。自念所從來。生千億世時事。是我爲一其心生念。十五。王復問那先。何等爲讀書生念者。那先言。帝王有自古之書。念言某帝某年時書也。是爲讀書生念。十六。王復問那先。何等爲曾有所寄更見生念者。那先言。若人有所寄。更眼見之。便生念。是爲所寄生念。王言善哉。王復問那先。佛寧悉知去事。甫始當來事耶。那先言。然。佛悉知之。王言。假令佛悉知諸事者。何故不一時教諸弟子。何故稍稍教之。那先問王。國中寧有醫師無。王

言有醫師。寧能悉知天下諸藥不。王言能悉識知諸藥。那先問王。其醫師治病。爲一時與藥。稍與之王。言人未病。不可豫與藥。應病乃與藥耳。那先言佛雖悉知去來見在之事。亦不可一時悉教天下人。當稍稍授經戒令奉行之耳。王言善哉。王復問那先。卿曹沙門言。人在世間作惡。至百歲臨欲死時。念佛。死後者皆得生天上。我不信是語。復言殺一生死即當入泥犁中。我不信是語。那先問王。如人持小石置水上。石浮耶。沒耶。王言其石沒。那先言如令持百枚大石置船上。其船寧沒不。王言不沒。那先言船中百枚大石。因船故不得沒。人雖有本惡。一時念佛。用是故不入泥犁中。便得生天上。其小石沒者。如人作惡。不知佛經死後便入泥犁中。王言善哉。王復問那先。卿曹用何等故行學道作沙門。那先言我以過去苦現在苦當來苦。欲棄是諸苦。不欲復受更。故行學道作沙門。王復問那先。苦乃在後世。何爲豫學道作沙門。那先問王。王寧有敵國怨家欲相攻擊不。王言然。有敵國怨家。常欲相攻擊也。那先問王。敵主臨來時。王乃作鬪具備守掘塹耶。當豫作之乎。王言當豫有儲待。那先問王。用何等故豫作儲待。王言備敵來無時故。那先問王。敵尚未來。何故豫備之。那先復問王。飢乃田種渴乃掘井耶。王言皆當豫作之。那先言尙未飢渴。何故豫作調度。王言善哉。王復問那先。第七梵天去是幾所。那先言甚遠。令石大如王殿。從第七梵天上墮之。六日月乃墮此間地耳。王言卿曹諸沙門言。得羅漢道。如人屈伸臂頃。以飛上第七梵天上。王言我不

信是。行數千萬億里。何以疾乃爾耶。那先問王。王本生何國。王言我本生大秦國。國名阿荔散。那先問王。阿荔散去是間幾里。王言去二千由旬。合八萬里。那先問王。頗曾於此遙念本國中事不。王言然。恒念本國中事耳。那先言王試復更念本國中事。曾有所作爲者。王言我即念已。那先言王行八萬里。反復何以疾。王言善哉。王復問那先。若有兩人於此俱時死。一人上生第七梵天。一人生罽賓。去是七百二十里。誰爲先到者。那先言兩人俱時到耳。王言相去遠近。多何以俱至。那先問王。試念阿荔散。王言我已念之。那先復言王試復念罽賓。王言我已念之。那先問王。念是兩國何所疾者。王言俱等耳。那先言兩人俱死。一人上生第七梵天。一人上生罽賓。亦等耳。那先問王。若有一雙飛鳥。一鳥於大樹上止。一鳥於小卑樹上止。兩鳥俱止。誰影先在地者。王言其影俱到地耳。那先言兩人俱死。一人上生第七梵天上。一人上生罽賓。亦俱時至耳。王言善哉。王復問那先。人用幾事學知道。那先言用七事學知道。何等爲七。一者念善惡之事。二者精進。三者樂道。四者伏意爲善。五者念道。六者一心。七者適遇無所憎愛。王復問那先。人用此七事學知道耶。那先言不悉用七事學知道。智者持智別知善惡。用是一事別知耳。王復問那先。假令用一事知者。何爲說七事。那先問王。如人持刀著鞘中倚壁。刀寧能自有所割截不。王言不能有所割截。那先言人心雖明。會當得是六事共成智耳。王言善哉。王復問那先。人家作善得福大耶。作惡得殃大耶。那先言人作

善得福大。作惡得殃小。人家作惡。日自悔過。是故其過日小。人家作善。日夜自念歡喜。是故得福大。那先言。昔者佛在時。其國中有人。机無手足。而取蓮華持上佛。佛即告諸比丘言。此机手足兒。却後九十一劫。不復墮入泥犁中。畜生薛荔道中。得生天上。天上壽終復還作人。是故我知人作小善得福大。作惡其人自悔過。日消滅而盡。是故我知人作過其殃小。王言善哉。王復問那先。智者作惡。愚人作惡。此兩人殃咎誰得多者。那先言。愚人作惡得殃大。智人作惡得殃小。王言不如。那先言。王言我國治法。大臣有過。則罪之重。愚民有過。則罪之輕。是故智者作惡得殃大。愚者作惡得殃小。那先問王。譬如燒鐵在地。一人知爲燒鐵。一人不知。兩人俱前取燒鐵。誰爛手大者耶。王言。不知者爛手大。那先言。愚者作惡。不能自悔。故其殃大。智者作惡。知不當所爲。日自悔過。故其殃少。王言善哉。王復問那先。人有能持此身飛行上至第七梵天上。及至罽單越地。及所欲至處者不。那先言能。王言。奈何持此身上第七梵天。及罽單越地。及所欲至處乎。那先問王。王寧自念少小時。跳戲一丈地不。王言。我年少時。意念欲跳。便跳一丈餘地。那先言。得道之人。意欲跳。至第七梵天上。及至罽單越地者。亦爾。王言善哉。王復問那先。卿曹諸沙門言。有骨長四千里。何等身骨。乃長四千里。那先問王。曾聞大海中有大魚名質。身長二萬八千里者不。王言然。有是。我曹聞之。那先言。如是二萬八千里魚。其脅骨長四千里。王怪之。爲。王復問那先。卿曹諸沙門說言。我能斷喘息。

之事。王言奈何斷喘息氣耶。那先問王。寧曾聞志不。王言我聞之。那先言王以爲志在人身中耶。王言我以爲志在人身中。那先言王以爲愚。人不能制其身口者。不能持經戒者。如此曹人亦不樂其身。那先言其學道人能制身口能持經戒能一其心。得四禪便能不復喘息耳。王言善哉。王問那先。爲呼言海海。爲是水名爲海耶。用他事故言海。那先言人所以呼爲海者。水與鹽參各半。是故爲海耳。王復問那先。何以故海悉鹹如鹽味。那先言所以海水鹹者。淡畜以來久遠及魚鼈蟲多共清便水中。是故令鹹耳。王言善哉。王復問那先。人得道以寧。能悉思惟深奧。衆事不。那先言然。人得道以能悉思惟深奧之事。那先言佛經最深奧。知衆事不可稱量。衆事皆智不斷之。王言善哉。王復問那先。人神智自然。此三事寧同各異。那先言人神者生覺。智者曉道。自然者虛空無有人。王復問那先言。得人何等爲得人者。眼視色耳聽聲鼻聞香口知味身知龜軟意知善惡之事。何所爲得人者。那先問王。如令人能目自視。脫瞳子去之視寧廣遠不裂。大其耳聽聲寧廣遠不。決鼻令大。其聞香寧多不。開口令大。知味寧多不。剝割肌膚。寧令信知龜軟不。拔去其志。盛念寧多不。王言不也。那先言佛在所作甚難。佛所如甚妙。王復問那先。所作何等甚難何等甚妙。那先言佛言能知人腹中目所見事悉能解之。能解目事能解耳事能解鼻事能解口事能解身事能解取事能解疑事能解所念事能解神事。那先言人取海水含之。寧能別知口中水是泉水是某流水

是某河水。王言衆水皆合爲一。難各別知。那先言佛所作爲難皆能別知。是諸水味。今海水見目前之事。王尚不能別知。今人神不見人身中有六事不可見。那先言是故佛解之。從心念至目所見。從心念至耳所聽。從心念至鼻所嗅。從心念至口知味。從心念至身知苦樂寒溫。從心念至佛。從心念有所向。佛悉知分別解之。王言善哉。那先言夜已半我欲去。王即勅傍臣取四端氈布。搵置麻油中。持以爲炬。當送那先歸。恭事那先如事我身。傍臣皆言受教。王言得師如那先作弟子。如我可得道疾。王諸所問。那先輒事事答之。王大歡喜。王即出中藏好衣直十萬已上。那先。王語那先。從今已去。願那先日與八百沙門共於宮中飯食及欲所得。皆從王取之。那先報王。我爲道人略無所欲。王言那先當自護。亦當護我身。那先言何等當自護及護王身。王報言。恐人論議呼王爲慳。那先爲王解諸狐疑。而不能賜與。恐或人言那先不能解。王狐疑。故王不賞賜。王言那先受者當令我得其福。那先亦當護其名。王言譬如師子在金檻中。猶爲拘閉。常有欲望去心。今我雖爲國王在宮省中。其意不樂。欲棄國去而行學道。王語竟。那先便起歸佛寺。那先適去。王竊自念。我問那先爲何等事。那先爲解我何等事。王自念。我所問那先莫不解我意者。那先歸佛寺亦自念。王問我何等事。我亦報王何等事。那先自念。王所問者我亦悉爲解之。念此事至天明。明日那先被袈裟持鉢直入宮上殿坐。王前爲那先作禮。已乃却坐。王白那先。那先適去我自念。問那先何等語。那先報

我何等語。我復自念。所問那先。那先莫不解我意者。我念是語。歡喜安臥至明。那先言我行歸舍亦自念。王爲問我何等事。我亦爲王說何等事。我復自念。王所問我輒爲解之。用是故歡喜至明。語竟。那先欲去。王便起爲那先作禮。

那先比丘經卷下